

# Kaarata yoolebiwa ni Zhuda

## Madhu oovolowana

Kaarata ela elebiwe ni Zhuda, mwiimeleli a Yesu Kirixtu, ddibila a Tiyago ole aali murumiwi ni musogoleli a mutugumano wa oZheruzalemi (Tiyago 1.1, Meerelo a Arumiwi 15.13). Zhuda aali ddibila a Yesu (Matewuzhi 13.55, Maruku 6.3). Kaarata ela yalebiwe muwari mwa yaaka ya 64 ofiyedha 67 Kirixtu agabaliwe.

Kaarata ela yalebeliwe wi yaawaraalihe aKirixtu aatene odheela anamasuuziha ooratha yamwadhela moobuwelelo oovirigana mmagerezha. Teto kaarata ela enofwanafwana ni kaarata ya nabiili ya Peduru, onafuna waawaraaliha anameelenga “owana koddo odheela nrromelo Mulugu navahiliye kuluwi mulogo waaye woweela”. Moone verisikulu 3.

Zhuda onowaakokomezha aKirixtu wi ekalege oolibeene munroromeloni, ehikalege ookwekwethiwa ni anamasuuziha ooratha.

## Ogawanyeya wa kaarata

Madhu oolajela 1-2.

Owaraaliha mwaha wa anamasuuziha ooratha 3-16.

Owaraalihiwa ni olibihiwa munroromeloni 17-23.

Omuthithimiha Mulugu 24-25.

---

## Madhu oolajela

<sup>1</sup>Wa owiithaniwa, ale Mulugu Baba enaadhiveliye ekameeliwaga ni Yesu Kirixtu. Di miyo Zhuda, mwiimeleli a Yesu Kirixtu, ddibila a Tiyago.

<sup>2</sup>Mulugu oweenjedhedheni thagaraga, murenddele ni odhivela.

## Owaraaliha mwaha wa anamasuuziha ooratha

<sup>3</sup>Akwaaga oodhivela, gahikathamiheya vajinji voofuna wuulebelani odheela ovulumusiwa winniihuna muumohini, gihiiwaddihedha wuulebelani wi muwaraale ni owana koddo odheela nrromelo Mulugu

naavahiliye kuluwi mulogo waaye woweela. <sup>4</sup>Ebaribari athu ehinamuriiha Mulugu, ehivolowa munikuruni neehu mowiipiteya. Aliwa enathukula mutheenga wa mahala a Mulugu eehu wi ekuneelegena dhifunelo dha mwiili dheewa, vano omukooddaga Yesu Kirixtu, Mwiinya ni Nabwiya eehu. Wale Maleba Ootaleleya yahiwaraaliha wi athu abure ala, yeere othongiwa. <sup>5</sup>Naari muganonileve dhaatedhene dhedhi, ginafuna guwuubusedheni wi Nabwiya ahivulumusa nlogo na Ezarayeli waavenyiha wEgubuddu, mbwenye ahaatolosa ale yahamuroromele. <sup>6</sup>Mwawuubuwelelege angero ale yahaakwanihile makalelo eewa owambeela, yahihya murudda weewa, aliwa efugeliwe wiipipini, waamaga ni fingwi dhahinatapuleya, ofiyedha Nlabo Nuulubale na othongiwa. <sup>7</sup>Muubuwelelege dheereyile oSoddoma ni Gomora,<sup>a</sup> ni maluwa owaaddamela, aliwa yeerile wona angero ale yaharile mookwaranya dha mararuwo dhafuna mwiili. Eheliwe wi ekale etoonyihedho, yoonaga goyi omunddoni woohumala.

<sup>8</sup>Athu ayo evolowile munikuruni mweenyu, eneedda ni mukalelo mmohive eharaga dhooroha dheewa, dhitalalihaga thima ya mwiili, enokoodda othongi wa Mulugu, yaanyemulaga oothithimiheya a odhulu. <sup>9</sup>Naari Migeli, musogoleli a angero,<sup>b</sup> keerilena ndo, akanganaga ni Sathana mwaha woothukula muruthu wa Mozezi, oliye kaaxixile omwaa-kula Sathana ni madhu oomunyemula, mbwenye eerile ayi: “Nabwiya oohiie!” <sup>10</sup>Athu ayo enonyemula dhaatedhene dhihinoniliisu; dhinoniliisu sootaduwa wona aneenyama ehinanonelamo, sineeriisuna, dhedho sinaapahula.

<sup>11</sup>Aliwa booddilu! Enahara dila ya Kayini.<sup>c</sup> Ehiipeleka muuthegani mwa Balaamu, esayelaga mpurelo wa korowa,<sup>d</sup> enotolosiwa wona dheerile Kora<sup>e</sup> ni ale yannigiyena.

<sup>12</sup>Aliwa enotakaliha mitugumano dheenyu vinagumaniinyu wi mujevo mathanga owaandana, enoja vamohi ni nyoovo ehikalagana manyazo. Amakambuzi eneekameela weekiwa; enakalahi mirabo dhihinamurubwiha muzongwe, dhineeddihiwa ni pevo; dhili wona mithanko dhihinavaha vansakani viwa, dhadduleye dhikwa-kuluwi. <sup>13</sup>Eli wona kuluzi yowuuba ya munyaza, enakuthulela ode nipweru nookaliha manyazo eewa; enaligana ni ttenderi dhooholowa, ala Mulugu ohaaloglelela mburo wooddiiha wiipipini.

<sup>14</sup>Enoki,<sup>f</sup> oli nikolo a neetanu ni abiili wambeela wa Adamu, ahaavuwihela mutheenga wa Mulugu aliwa, wiira: “Moone! Nabwiya onadha adhe ni macikwi ni macikwi a angero aaye oweela, <sup>15</sup>wi aathonge athu

<sup>a</sup> 1.7 Moone Wambeela 19.1-24    <sup>b</sup> 1.9 Moone Daniyeli 10.3,21; 12.1; Ovuhulela 12.7

<sup>c</sup> 1.11 Moone Wambeela 4.3-8    <sup>d</sup> 1.11 Moone Numero 22.1-35    <sup>e</sup> 1.11 Moone Numero 16.1-35    <sup>f</sup> 1.14 Moone Wambeela 5.21-24

aatene, aakone anambure aatene mwa dhowiira dheewa dhaatedhene dhootakala dheeriisuna teto ni dhooruwana dhaatedhene anamathega abure dhamwiireliisu Mulugu”.<sup>16</sup> Athu ala anamaaba, boohudhiviwa. Eharihaga obure winniisuna, ewogaga dhoodhiviha wa athu wi yiirege bowaakwanela esayelaga opura weewa.

#### Owaraalihiwa okala a ntidi

<sup>17</sup>Mowindo, akwaaga oodhivela, muubuwelelege dhaaddeliwiinyu ni arumiwi a Nabwiya eehu Yesu Kirixtu. <sup>18</sup>Aliwa yahuwaaddelani wi: “Malabo oomariha, enoodha athu amohi ebeddege dhego dha Mulugu, eneeddege eharaga dhifunelo dheewa dhootakala”. <sup>19</sup>Baayene enatata-mula ogawanyeya, enahara dhifunelo dha mwiili dheewa, Muneba wa Mulugu kuli mwa aliwa.

<sup>20</sup>Vano nyoovo akwaaga oodhivela, munnuwege munroromeloni mweenyu, nili noweelesesa, mulobelege moosogoleliwa ni Muneba Woweela. <sup>21</sup>Kalanive oweedda moodhivela wa Mulugu, mujejihaga wi thagaraga dha Nabwiya Yesu Kirixtu, dhuuthukuleleni mwiigumini yoohumala.

<sup>22</sup>Mwaweediwelege thagaraga ooyeva nrromelo; <sup>23</sup>wa amohi, mwaavulumusege, mwawaapule vamunddoni; mwaweediwele thagaraga amohi ni mukalelo wowoovelela, mwiiddane ni dhoowara dhiwa-dhene dhivalihiwe obure wa mwiili dheewa.

#### Omuthithimiha Mulugu

<sup>24</sup>Mulugu onowaanda wuurabelihani wi muhumore, mwafiye va-meentoni va nthithimihoni naaye, mwihinna yoohaleela, ni ohagalala wuulubale. <sup>25</sup>Wa Mulugu mmohi, Mvulumusi eehu, okale nthithimihoni, oriiheya, Omwene ni othongi odheela Yesu Kirixtu, Nabwiya eehu, wambeela mudhidhi dhaatedhene, dhiinova, okala ni okala. Ameni.<sup>§</sup>

---

§ 1.25 Ameni enatapulela *Dhikale ndo*, naari wi *Siibaribareene*.